

समे – 12:25 hrs.

<><><><><><>

PM-MKB

प्रधानमंत्री नरेंद्र मोदी होरें अज्ज आकाशवाणी परा मन की बात संबोधन च आखेआ जे आपरेशन सिंदूर नै आतंकवाद खलाफ लड़ाई च नमा बसा-भरोसा पैदा कीता ऐ। उनें आतंकी ठिकानें पर सटीक हमले लेई भारतीय बलें दी दिलेरी दी तारीफ कीती। श्री मोदी होरें इस मिशन गी देशभक्ति दा प्रतीक दस्सेआ जिनें देसै गी इक्कजुट करी दिता। उनें तिरंगा यात्रा, नागरिक सुरक्षा स्वयंसेवकें दे तौरा पर नौजोआनें दी हिस्सेदारी, कविताएं ते कला राय देशभक्ति दी भावना पर लौ पाई। उनें आत्मनिर्भर भारत तैहत स्वदेशी थेआरें ते टैक्नालजी गी श्रेय दिंदे होई इंजीनियरें ते तकनीशियें दे जोगदान गी स्वीकार कीता। 21 जून गी मनाए जाने आहले अंतरराष्ट्रीय योग दिवस पर श्री मोदी होरें विशाखापत्नम च अपनी हिस्सेदारी दी घोषणा कीती। श्री मोदी होरें योग गी ग्राएं-मोहड़ें तगर लेई जाने दियें कोश्टें दी बी सराहना कीती। मन की बात च श्रोताएं गी गुजरात दे गिर च शेरें दी आबादी बारै दस्सदे होई प्रधानमंत्री होरें खुशी जाहिर कीती जे हुन शेरें दी गिनतरी 5 बरें च 674 थमां बदियै 891 होई गई ऐ। श्री मोदी होरें कागज दे कचरे बकखी बी ध्यान खिच्चेआ ते लोकें गी रीसाइक्लिंग अपनाने दी अपील कीती। प्रधानमंत्री होरें 20 मई गी मनाए गेदे विश्व मधुमक्खी दिवस बारै बी गल्ल कीती। उनें आखेआ जे जम्मू-कश्मीर, उत्तर प्रदेश, गुजरात, पच्छिम बंगाल ते

अरुणाचल प्रदेश च ज्हारां महिलां ते नौजोआन मखीर उद्यमी बनी गेन जेड़ा स्वरोजगार ते आत्मनिर्भरता दी इक मिसाल ऐ।

<><><><><><>

Tiranga-Rally Ramban

आपरेशन सिंदूर दी कामयाबी दा जश्न मनाने आस्तै रामबन दी बेंठी पंचैत च इक शानदार तिरंगा रैली दा आयोजन कीता गेआ। इस कार्यक्रम च थेआरबंद बलें आस्तै मजबूत समर्थन दा प्रदर्शन कीता गेआ जेदे च बक्ख-बक्ख पृष्ठभूमि दे लोकें हिस्सा लैता जिनें उत्साह कन्ने राश्ट्रीय झंडा फहराया ते देशभक्ति दे नारे लाए। आकाशवाणी समाचार कन्नै गल्ल करदे होई रैली च हिस्सा लैने आहले किश लोकें आखेआ। तोआई, आई.टी.आई जम्मू दे एन.सी.सी कैडेटें बी तिरंगा रैली दा आयोजन करियै देशभक्ति ते इक्कजुटता दा संदेश दिता।

<><><><><><>

Northern-Army CMDR

सेना दी उत्तरी कमान दे अध्यक्ष लेफ्टिनेंट जनरल प्रतीक शर्मा होरें कब्जा रेखा पर फायर एंड फ्यूरी कोर दी बनावट ते इकाइयें दा दौरा लाया। दौरे दौरान श्री शर्मा होरें अभियान सरबन्धी तैयारियें ते मौजूदा सुरक्षा स्थिति दी समीक्षा कीती। उनें फौजियें दी तनदेयी कन्नै कम्म करन आहली भावना ते नमियें तकनीकें दे असरदार इस्तेमाल लेई उंदी तरीफ कीती। कमांडर होरें हर जवान ते अफसरें पर जोर पांदे होई आखेआ जे ओह कुशलता दे सब्बनं शा उच्चे मानकें गी बनाए रखदे होई कुसै बी चुनौती दा मकाबला करने लेई तैयार रौहन।



MM Lib. Cafeteria Launch

विरासती थाहरें गी सांभियै रखने आहली इक्क महत्वै आहली गेंs च ऐतिहासिक मुबारक मंडी परिसर हुन विरासती लाइब्रेरी ते कैफेटेरिया दे उद्घाटन कन्नै लोकें दे सोआगत लेई पूरी चाल्ली तैयार ऐ। जम्मू पूर्व थमां विधायक युद्धवीर सेठी होरें एक्स पर इक सोशल मीडिया पोस्ट च ताजा जानकारी सांझी कीती ऐ। श्री सेठी होरें इस गें गी इलाके ताईं मानै आहला पल दस्सेआ। इस पहल दा मकसद मुबारकमंडी परिसर दी सांस्कृतिक विरासत गी सांभियै रखना ऐ। इत्थे नमियें स्हूलतें दे बदने करियै सैलसफे गी बढ़ावा थहोने ते लोकें गी शैहरै दी सगगोसार ऐतिहासिक जड़ें कन्नै नमैं सिरेआ जुड़ने दी मेद ऐ।



JMC-Commissioner-Visit

राश्ट्री सतह पर चला जा करदे साफ हवा आहले कार्यक्रम NCAP तैहत शैहरै गी हरा-भरा बनाने आस्तै इक्क बड़्डी गेंs दे तौरा पर जम्मू नगर निगम दे कमिशनर डॉ. देवांश यादव होरें निगम दे इलाकें दा व्यापक दौरा लाया। श्री यादव होरें नरवाल, भठिंडी, सुजवां, ग्रेटर कैलाश, बखशी नगर, प्लौड़ा, बी.सी रोड ते सुपर स्पेशिलिटी अस्पताल दे आले-दोआले दे इलाकें दा दौरा लाया तां जे सैला क्षेत्र विकसित करने ताईं थाहरें दी पंछान कीती जाई सकै। इस पहल दा मकसद शहरा दियें खाली थाहरें गी पर्यावरण मताबक क्षेत्रें च तबदील करियै

सार्वजनिक कल्याण गी बढ़ावा देना ऐ। इस गेंऽ कन्नै जम्मू दे बसनीकें गी साफ-सुथरी हवा ते सेहतमंद जिंदगी लेई बेहतर वातावरण मिलने दी मेद ऐ।

<><><><><><>

Doda Internet Service

सरकारै डोडा जिले दे भद्रवाह दे किश हिस्सें च मोबाईल इंटरनेट सेवा गी 27 मई तोहड़ी आरजी तौर पर बंद करी दिता ऐ। एह फैसला राश्ट्र बरोधी तत्वे आसेआ सार्वजनिक बवस्था च बगाड़ पाने दे मकसद कन्नै मोबाईल इंटरनेट दे माड़े इस्तेमाल दी शेंका दे मददेनजर लैता गेआ ऐ। आकाशवाणी दे जम्मू संवाददाता दी रिपोर्ट मूजब, गृह विभाग नै आखेआ ऐ जे जम्मू जोन दे आईजीपी भीम सेन टूटी हुंदे निर्देशें पर 37 मोबाईल टॉवरें पर मोबाईल इंटरनेट सेवा ते सार्वजनिक वाई-फाई सेवा गी मुअत्तल करी दिता गेआ ऐ। हुकमै मूजब, देसै दी संप्रभुता ते अखंडता, प्रदेश दी सुरक्षा ते सार्वजनिक बवस्था बनाई रखने दे मकसद कन्नै मोबाईल इंटरनेट सेवा गी आरजी तौर पर बंद करने दा एह फैसला लैता गेआ ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते

पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौंहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>